



Tuan Abdullah Singgora Yang di-Pertua *Social Club*

Singapura dalam rencananya telah menuduh ulama-ulama dan orang-orang yang ahli dalam hal-ehwal agama bertopengkan agama kerana mereka ulama-ulama menuduh perkelahan *Social Club* anjurannya itu dikatakan menyalahi agama pada hal menurut pendapatannya *Social Club* tajaannya itu adalah “bersesuaian dengan agama” dan “tidak menyalahi agama”. Melihat kepada pandangannya ini adalah menunjukkan bahawa harus Abdullah Singgora tidak tahu apa yang dicakapnya kerana di manakah persesuaian cara berkelah yang serupa itu dengan hukum agama?! Adakah agama meluluskan sepergaulan lelaki dengan perempuan khususnya aurat perempuan terdedah, setengah-setengahnya di atas paha? Tunjukkanlah nasnya ya Singgora!!

* * *

Di dalam ucapannya di majlis yang diadakan oleh kelab wartawan baharu-baharu ini Tengku Abdul Rahman Yang di-Pertua UMNO telah mendatangkan tiga pernyataan yang nampaknya dihadapkan kepada orang-orang Melayu yang menubuhkan parti negara: (1) Adakah mereka akan memberikan jawatan menteri besar kepada orang-orang yang bukan Melayu; (2) Adakah mereka akan memberikan jawatan M.C.S. kepada orang yang bukan Melayu; dan (3) Adakah mereka akan membuka tanah Malay Reservation kepada orang yang bukan Melayu?

Tengku Abdul Rahman harus lupa atau tidak teringat akan beberapa syarat yang termaktub di dalam undang-undang tubuh tiap-tiap buah negeri kerana sekiranya beliau teringat kepada yang demikian harus ia tidak mengeluarkan pernyataan itu.

Tiap-tiap buah negeri (raja-raja) ada undang-undang tubuhnya yang di dalamnya ada menyebut (kurang lebih) bahawa sultan bagi tiap-tiap sebuah negeri itu hendaklah seorang Islam dan raja hendaklah melantik seorang menteri besarnya daripada orang

Melayu yang beragama Islam. Undang-undang tubuh itu tidak akan dapat dirombak melainkan dengan suatu kebangkitan dan penghapusan atasnya. Sedang perkara yang kedua dan ketiga adalah perkara yang belum berjalan perubahan daripadanya kerana masih ada syarat-syarat di dalamnya yang termaktub di dalam perjanjian di antara raja-raja dengan kerajaan British – jadi pernyataan itu hanya mahu didatangkan.

Seorang peguam ahli UMNO juga tatkala membaca berita itu berkata: “Pernyataan itu semolek-moleknya Tengku sendiri mencubanya”.

Wal hasil sesuatu perkataan atau pernyataan yang selalu lepas itu terkeluar daripada mulut seorang penganjur adalah patut difikir dengan cermat lebih dahulu supaya jangan dapat dicelah orang. Bukankah “Fikir dahulu pendapatan fikir kemudian tiada berguna”?

* * *

Muktamar Islam di Tenggara Asia telah mengeluarkan suatu seruan am meminta supaya orang ramai membantu seberapa segeranya supaya Kolej Islam segera dijalankan kerana sekarang hanya wang yang didapati sebanyak \$137,000 sahaja iaitu 45 peratus daripada wang yang dikehendaki untuk menjalankan kolej itu.

Sebagaimana Muktamar Islam di tenggara Islam dipengerusikan oleh Yang Mulia Dato’ al-Sayyid Ibrahim bin ‘Umar al-Sagov maka begitulah juga pengerusi pungutan kolej Islam itu pun beliau juga. Beliau sudah berjanji memberi sebanyak \$50,000 tetapi dengan malangnya janji itu diberi bersyarat sehingga cukup pendapatan derma itu sebanyak \$300,000 baharulah derma itu akan didapati oleh kolej Islam – kalau tidak maknanya kolej Islam yang dipengerusikannya itu akan melumu telunjuk sahaja – derma yang diharap tidak sampai, pergi ke lain atau pun lainnya.

Orang-orang Islam tentu berharap derma itu akan diberikan kepada kolej Islam dengan mencabut syarat yang tersebut kerana jika tidak pengerusinya lebih dahulu membuka tangan maka bagaimanakah tangan orang lain akan lebih terbuka kerana orang lain tahu bahawa pengerusi kolej itu seorang jutawan!

– Cemeti al-Farouk